

27. marts 2019

UPA2019/8

2018-imut Ilassutissatut aningaasaliissutitut Inatsisissatut siunnersuut

(Aningaasaqarnermut Nunanilu Avannarlerni Suleqatigiinnermut Naalakkersuisoq)

Siumumiit imaattumik oqaaseqaateqarusuppugut:

Ataatsimut isigalugu 2018-mi arlalinnik pisoqartarpoq aningaasatigut ingerlatsinermi eqquisartunik. Amerlanerpaartaallu Aningaasaqarnermi Ataatsimiititaliami pissusissamittut isummerfigineqartarput.

Nunaavugut annertunerpaamik aalisarnermik inuussutissarsiortuusugut. Pissusissamisoortuuvorlu imartatta aalisagaqassusianik misissuinerit uagut nammineq ingerlakkutsigit.

Siumumiit pissusissamisoortutut isigaarput aalisakkanik misissuinermi atorpeqartoq "Paamiut" nutaanngilisimasoq nutamik taarserneqarnissaanut immikkut 95 mio. kr. 2018-imi aningaasaliisoqarmat.

Aammattaaq nunatta avannaani ajunaarner-suarmi eqqugaasunut inissialiornernut immikkut 11 mio. Kr. aningaasaleeqqinneq pissusissamiisoortutut isigaarput.

Nuummi inissarsuit ilaasa nutanik aneerasaartarfiliorneqarnerinuit aningaasaliissutit aamma Siumumiit pissusissamisoortutut isigaagut.

Inatsisissatut siunnersuut ataatsimut isigalugu Siumumiit isumaqarpugut Sanaartukkat amerlasuut sanaartorneqarnerisa kinguaattoortarnerat isigalugu suliassat pingaassusii eqqarsaatigalugu tulluanngitsoq. Naalakkersuisut qinnuigissavagut suliassat aallartiaartarnissaat sapinngisamik eqqumamaffigeqqullugu.

Suliat ataasiakkaat immikkut taagunngikkaluarlugit Siumumiit ataatsimut isigalugu isumaqarpugut suliassat aningaasaliiffiqineqareersimasut piaarnerusumik Naalakkersuisuniit Ataatsimiititaliamut ingerlatinneqartariaqartut.

Nunatsinni suliffissaaleqisut ikiliartornerat tamatta nuannaarutigaarput. Nalunngilarpullu nunatta inissisimanerata takutikkaa ilaatigut suliffissaaleqineq nunap immikkoortuini annerullunilu minnerusartoq.

Taamaattumik Siumut isumaqarpoq Aningaasatigut Inatsimmi aningaasaliissutissatut aalajangiussat piaarnerusumik atorlugit aammalu pissutsit aallaavigalugit atorpeqartariaqartut. Ilaatigummi takuneqarsinnaavoq soorlu ukiut qulit tikillugit suliassatut pilersaarutitut aalajangiussaasimasuugaluit suli iluamik aallartinneqanngitsut

Takusinnaavarput nunap immikkoortuisa ilaanni inukilliartortoqartoq. Partiinut tamanut kajumissaarutigissavarput suleqatigiissinnaaneq aqutigalugu nunap immikkoortuini ajornartorsiuutaasinnaasut, soorlu suliffissaaleqineq isigalugu, piaartumik aaqqinneqarnissaannut suleqatiserlugit.

Taamatut oqaaseqarluta oqaluuserisap aappassaaniinginnerani Inatsisartut Aningaasaqarnermut ataatsimiititaliaanni suliarineqarnissaa innersuussutigissavarput.

Hermann Berthelsen, Siumut